

# О Дујто Послание џико Тимотеј

## Поздрав

**1** <sup>1</sup> О Павле, апостоли е Христа Исусескоро пали Девлескири војља, според о ветимо живото ко Христос Исус, <sup>2</sup> џико Тимотеј, о мангло чедо, о благодат, милост, хем мир таро Девел о Дат хем о Христос Исус, амаро Господари.

## Те тхабљаќере е Девлескоро дари

<sup>3</sup> Благодаринава е Девлеске Каске служинава панда таро мле прародитејља чисто совестеја, спомнинаватут стално – и рат хем диве – ко мле молитве; <sup>4</sup> а кога ка спомнинав баши тле асва, сијум бут жедно те дикхавтут, те пхерѓовав радостеја, <sup>5</sup> кога спомнинава манге баши нелицемерно вера која тани ки туте, која прво аракхљаѓовела сине ки тли баба и Лоида хем ки ти дај и Евника, а уверимо сијум хем ки туте.

<sup>6</sup> Одолеске, потсетинаватут те тхабљаќере е Девлескоро дари, кој тано ки туте преку со чхиѓум мле васта. <sup>7</sup> Соске о Девел на денѓамен духо даракоро, него духо силакоро, мангипе, хем самоконтрола.

## Ма лаца таро сведоштво

<sup>8</sup> Хем аѓар, ма лаца таро сведоштво баши амаро Господари хем мандар, о затворнико баши Леске, него циде хем туда манцар баши о Евангелие, според и сила е Девлескири, <sup>9</sup> Кој спасинѓамен хем повикујнѓамен свето викибаја, на според амаре дејља него пали Пли сопствено одлука хем благодат, која аменге денди ко Христос Исус англедер о вечна времеа, <sup>10</sup> а која акана откринѓапес преку о јавибе амаре Спасителескоро о Христос Исус, Кој уништинѓа о мериба хем осветлинѓа о живото хем о бизомериба преку о Евангелие, <sup>11</sup> баши кова ме сијум поставимо сар проповеднико, хем апостоли, хем учители.

<sup>12</sup> Баши одова хем трпинавале са акава, ама на лацава, соске џанава ки Касте поверујнѓум хем уверимо сијум дека Ов шај те запазинел окова со доверинѓум Леске, џико одова Диве.

## Запазин о шукар сој туке доверимо

<sup>13</sup> Нека овентут, сар пример, о састе лафиа со шунѓанлен мандар, вераја хем мангипаја ко Христос Исус. <sup>14</sup> Запазин о шукар сој туке тано доверимо преку Свети Дух, Кој живинела ки аменде.

<sup>15</sup> Ту џанеја одова, дека ки Азија са цидингепе мандар, машкар кој тане о Фигел хем о Ермоген.

<sup>16</sup> О Господари те дел милост ко Онисофореске ко кхер, соске повише пути охрабринеламан сине хем на лаџандило таро мло пханлипа, <sup>17</sup> него, кога ало ко Рим, упорно родинѓама хем аракхљама.

<sup>18</sup> О Господари те деле те аракхел милост англо Господари ко одова Диве! Хем сар са услужинѓама ко Ефес, ту најшукар џанеја одова.

### **Поднесин сар шукар војнико**

**2** <sup>1</sup> Хем аѓар, ту мо чедо, зајакнин ки благодат, која тани ко Христос Исус! <sup>2</sup> Хем со шунѓан мандар, англо бут сведоќа, доверинле ко поверлива мануша, кој ка овен способна те поучинен хем јаверен!

<sup>3</sup> Поднесин манџар о цидиба, сар шукар војнико е Христа Исусескоро! <sup>4</sup> Никој, кој тано ки воено служба, на заплеткинелапес ко буќа акале животоскере, за да те угодинел околеске со повикујнѓале ки војска. <sup>5</sup> Исто аѓар, ако некој натпреваринелапе, на добинела венцо ако на натпреваринелапе прописно. <sup>6</sup> О Земјоделцо кој трудинелапес требела прво те пробинел таро плодиа. <sup>7</sup> Хајљов со ваќерава, о Господари ка делтут те хајљове са.

<sup>8</sup> Спомнин е Исусе Христо, Кој воскреснинѓа таро муле, Кој тано таро е Давидескоро потомство, според мло Евангелие, <sup>9</sup> баши кова цидава са џико пханлипа, сар дисаво билачхо мануш. Ама е Девлескоро слово нае тано пханло. <sup>10</sup> Баши одова издржинава са баши о избириме, та хем олада те добинен спасение е вечно славаја ко Христос Исус.

<sup>11</sup> Веродостојно тано о слово: „Ако мулем Олеја, Олејада хем ка живина; <sup>12</sup> ако трпинаја Олеја, хем ка царујна; ако одречинајамен Олестар, хем Ов ка одречинелпес амендар; <sup>13</sup> ако сијем неверна, Ов ачхола верно! Соске Коркори Пес наши те одречинел.“

### **Наш таро терникане желбе**

<sup>14</sup> Акава потсетинле, задолжинлен англо Девел, те на препириненпе баши о лафиа, одова нае тано корисно, него тано баши пропаст окола со шунена.

<sup>15</sup> Трудинтут пажливо, за да те сикаветут тут достојно англо Девел сар работнико, кој на требела те лаџал, кој правилно проповединела о слово е чачипаскоро!

<sup>16</sup> А цидетут таро нечиста хем чуче лафиа, соске асавке са повише ка џан англал ко бизодевлипа. <sup>17</sup> А ленгоро слово ширинелапе сар рако; таро кој тане о Именеј хем о Филет, <sup>18</sup> кој цидингепе дур таро чачипе, тврдинена дека о воскресение веќе уло хем одолеја рушинена и вера некаскири.

<sup>19</sup> Сепак цврсто бешела е Девлескири основа, која исила акава печати: „О Господари пенџарела кој тане Лескере“ хем „Те циделпе тари неправда секој, кој спомнинела е Господарескоро анав.“

<sup>20</sup> А ко баро кхер иси на само златна хем сребрена чаре него хем каштескере хем пхувјакере. Јек тане баши свечено употреба, а јавера баши секова диве те употребинен. <sup>21</sup> Хем аѓар, ако некој очистинѓапес таро акала, ка овел чаро баши свечено употреба, осветимо, корисно е домакинеске хем спремимо баши секова шукар дело.

<sup>22</sup> Наш таро терникане желбе! Џа пали правда, вера, мангипе хем мир околеницар кој повикујнена е Господаре таро чисто срце.

<sup>23</sup> Фрделен о глупава хем бизогоѓакере пучиба, џандипаја дека бијанена борбе. <sup>24</sup> А е Господарескоро слуга на смејнела те распрајнелпес, него требела те овел кротко ко сарине, способно те поучинел хем те трпинел; <sup>25</sup> те воспитинелен со кротост окола кој противиненапес, та неби ли делален о Девел покајание, баши пхердо пенџариба е чачипаскоро, <sup>26</sup> за да те отрезиненпес тари мрежа е бенгескири, кој заробинѓален за да те исполнинен олескири војља.

## **Ка овен пхаре времиа**

**З** <sup>1</sup> А акава џан: ко последна диве ка овен пхаре времиа, <sup>2</sup> соске о мануша ка овен себична, среброљубитејља, коркори те фалиненпе, горделива, хулитејља; непокорна е родителенге, неблагодарна, бизо светост; <sup>3</sup> бизо природно мангипе, на мангена те смириненпе, лена ки мен, наелен контрола,

дива, душмајна е шукарипаске, <sup>4</sup> предавниќа, избувлива, ваздима, повише дикхена те уживинен ке пле страстиа, а на те манген е Девле, <sup>5</sup> кој исилен изглед девликано, а одрекујнгепе тари олескири сила; цидетут хем олендар!

<sup>6</sup> Соске олендар тане окола кој чхивенапес ко кхера хем ховавена е проста џувлен натовариме гревонцар, кој тане водима таро различна страстиа, <sup>7</sup> кој сикљовена секогаш, а никогаш нашти те авен цико пенџарибе о чачипе.

<sup>8</sup> Хем сар со о Јаниј хем о Јамвриј спротивставингепес е Мојсеске, аѓар хем акала противиненапес е чачипаске, мануша ираме гоѓаја, препеле тари вера.

<sup>9</sup> Ама нае те напредујнен веќе, соске оленгоро делинипа ка откринелпес англо сарине, сар со откринѓапес хем околе дујенгоро.

### **Ачхов ко одова со сиклиљанле**

<sup>10</sup> А ту слединеја сине мло учење, о начин е живибаскоро, и замисла, и вера, о долготрпение, о мангипе, о трпение, <sup>11</sup> о гониба, о цидиба со случингепес манге ки Антиохија, Иконија хем Листра. Саве прогонствиа претрпинѓум, хем о Господари избавинѓаман таро са! <sup>12</sup> А хем сарине кој мангена те живинен девликано ко Христос Исус, ка овен прогониме, <sup>13</sup> џикоте о билачхе мануша хем о измамниќа ка напрединен ко билачхипе, те ховавен хем ка овен ховавде.

<sup>14</sup> А ту ачхов ко одова со сиклиљанле хем ко со сијан убедимо, соске џанеја кастар сиклиљанле хем <sup>15</sup> соске таро тло тикнипа пенџареја о Света Писмиа, кој шај те ќерентут мудро баши спасение преку и вера ко Христос Исус. <sup>16</sup> Цело Свето Писмо тано таро Девел вдахнујмо хем тано корисно баши сикљојба, баши те хајљова коте амаре грешке, баши поправиба хем баши воспитиба ки правда, <sup>17</sup> за да те овел е Девлескоро мануш совршено спремимо баши секова шукар дело.

### **Проповедин о Слово**

**4** <sup>1</sup> Задолжинаватут англо Девел хем о Христос Исус, Кој тано готово те судинел е џивденге хем е муленге, Олескере јавибаја хем Олескере царствоја; <sup>2</sup> проповедин о слово, настојн ко време хем ко невреме, ваќер коте грешинена, викин ленге, охрабрин са те стрпленеја хем сикљојбаја.

<sup>3</sup> Соске ка авел време, кога о мануша на ка трпинен и саста наука, него според пле страстиа ка кхеден песке учитејља, баши те овел оленгере каненге шукар,  
<sup>4</sup> хем ка иранен пле кана таро чачипе, а ка ираненпес ко парамиса.

<sup>5</sup> А ту ов трезвено ко са, трпин о цидибе, извршин и бути евангелисти, исполнин тли служба цико крајо. <sup>6</sup> Соске ме веќе чхорговава сар жртва, хем о време мле цајбаскоро ало. <sup>7</sup> Марѓума шукар борба, завршинѓум о прастајбе, запазинѓум и вера. <sup>8</sup> Отакана поадари спремимој тано мо венцо е правдакоро, со ка деле манге ко одова Диве о Господари, о Праведно Судија, хем на само манге, него хем сариненге, кој замангле Олескоро јавиба.

### **О Господари денѓаман сила**

<sup>9</sup> Погрижинтут те аве скоро ки манде, <sup>10</sup> соске о Димас мукхљама, соске замангља о авдисутно свето хем гело ко Солун; о Крискент гело ки Галатија, о Тит ки Далмација. <sup>11</sup> Само о Лука тано уза манде. Ле е Марко хем анале туја, соске манге тано корисно баши служба. <sup>12</sup> Е Тихике бичхаѓумле ко Ефес. <sup>13</sup> Кога ка аве, ана и наметка, со мукхљумла ки Трoада узи карпа, хем о лила особено о пергаментиа!

<sup>14</sup> О Ковачи о Александар ќерѓа манге бут билачхипе; о Господари ка платинел леске според олескере дејља. <sup>15</sup> Хем туда пазинтут олестар, соске противисалило бут баши амаре лафиа.

<sup>16</sup> Ки мри прво одбрана никој на сине манцар, него сарине мукхлема; нека мате рачунинелпес ленге одова! <sup>17</sup> Ама о Господари ачхило манцар, хем денѓаман сила, за да те исполнинелпес о проповедиба преку манде, хем те шунен са о народиа; хем избавинѓума таро е лавескоро муј. <sup>18</sup> О Господари ка избавинелма таро секова билачхо дело хем ка запазинелма баши Пло небесно царство. Олеске слава баши вечна вејќа. Амин!

<sup>19</sup> Поздравин е Прискила хем е Акила хем Онисифорескоро кхер! <sup>20</sup> О Ераст ачхило ко Коринт, а о Трофим мукхљумле насвало ко Милет. <sup>21</sup> Погрижинтут те аве анледер о јевен! Поздравиненатут о Еувул, о Пуд, о Лин, и Клаудија, хем са о пхрајља.

<sup>22</sup> О Господари о Исус Христос те овел тле духоја! И благодат те овел туменцар. Амин!